

Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip, qularnaveeqqusiisarneq pillugu Kalaallit Nunaannut inatsisip aamma aappariinnerup inatsisitigut sunniuteqarnera pillugu inatsisip Kalaallit Nunaannut atuutilersinneqarsimasup allanngortinneqarneri pillugit inatsimmut missingiutip (Eqqartuussivinnut 2024-imiit 27 ilanngullugu ukiunut arlalinnut isumaqatigiissutip ilaanik naammassinninneq) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut.

(Inuussutissarsiornermut, Niuernermet, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Akissuteqaat

(Inuussutissarsiornermut, Niuernermet, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Aappassaaneerneqarnera

Inatsisartut aalajangiiffigisassaattut siunnersuummut matumunnga peqqissaartumik suliarinnissimanerannut Inatsisinut Ataatsimiititaliaq Naalakkersuisut qutsavigiumavaat.

Eqqartuussiveqarnitta ullutsinnut naleqquttuunissaa sunniuteqarluartuunissaalu, eqqartuussiveqarnitsinnut pingaaruteqarpoq. Tamanna ilaatigut Kalaallit Nunaanni eqqartuussiviit it-kkut ikorfartorneqarnerisa pisariaqartinneqartut naammassineqarnerisigut, aamma eqqartuussivinni sulisunik isumalluutit amerlanerulersinneqarnerisigut aamma unnerluussat eqqartuussallu illersorneqarsinnaanermik siunnersorneqarsinnaanermillu atuisinnaanerisigut anguneqarsinnaavoq.

Eqqartuussivikkoortumik nalunaarsuinerup digitaliusumik ingerlanneqalernissaanut naammaginartumik kalaallisut aaqqiinnissamut aningaasat nassaarineqarnissaat pillugit Inatsiseqarnermut ministereqarfimmik oqaloqatiginninnerit Naalakkersuisut ingerlateqqinniarpaat, taamaalilluni systemip atorneqarnissaanut tamanut periarfissat assigiilerniassammata.

Taamatut oqaaseqarlutik amerlanerusunillu oqaaseqaratik siunnersuut aappassaaneerneqarnissaanut Naalakkersuisut tunniuppaat.